

四庫全書

集部

欽定四庫全書

集部

升菴集卷七十六

詳校官監察御史<sub>臣</sub>劉芬

中書<sub>臣</sub>劉源溥覆勘

總校官原任<sub>臣</sub>先王燕緒

校對官編修<sub>臣</sub>勵守謙

謄錄監生<sub>臣</sub>林紹龍

欽定四庫全書

升菴集卷七十六

明 楊慎 撰

崑崙九州

鄒衍言九州之外復有九州載于史記按其說曰東南

神州曰旦土

旦音與晨同

正南邛州

隋書作迎

曰深土西南戎州

曰滔土正西弇州

隋書作拾州

曰丹土正中冀州曰白土西

南柱州曰肥土西北玄州

隋書作營州

曰成土東北咸州曰

隱土

尸子作急土

正東揚州曰信土其言本荒唐漢人作河

圖括地象全祖其說隋代郊天遂以其名入從祀之位  
史炤通鑑釋文曰此九州其崑崙統四方之九州乎或  
曰神農地過日月之表蓋神農之九州也

桂州一本作  
營州一

本作宮州近是宮與  
玄相近未知孰正

### 五嶺考

裴氏廣州記云五嶺大庾始安臨賀桂陽揭陽鄧德明  
南康記云五嶺者臺嶺之嶠五嶺之第一嶺也在大庾  
騎田之嶠五嶺之第二嶺也在桂陽都龐之嶠五嶺之

第三嶺也在九真萌渚之嶠五嶺之第四嶺也在臨賀越城之嶠五嶺之第五嶺也在始安都龐水經注作部龍萌渚輿地志作明諸徐廣曰五十萬人守五嶺淮南子曰始皇利越之犀角象齒翡翠珠璣乃使尉屠睢發卒五十萬為五軍一軍塞鐔城之嶺一軍守九嶷之塞一軍處番禺之都一軍守南野之界一軍結餘干之水注鐔城在武陵西南接鬱林九嶷在零陵番禺在南海南野餘干在豫章其說五嶺又不同併志之於此

海外五岳

道經言海外蓬萊閭苑有五岳靈山一曰廣乘之山天之東岳也在東海之中為發生之首上有碧霞之闕瓊樹之林紫雀翠鸞碧藕白橘主歲星之精居九氣青天之內矣二曰長離之山天之南岳也在南海之中上有朱宮絳闕赤室丹房紫草紅芝霞膏金醴主熒惑之精居一氣丹天之內矣三曰麗農之山天之西岳也在西海之中上有白華之闕三素之城玉泉之宮瑤林瑞獸

主太白之精居七氣素天之内矣四曰廣野之山天之  
北岳也在北海弱水之中上多瓊樓寶闕金液龍芝主  
辰星之精居五氣玄天之内矣五曰崑崙之山天之中岳  
也在八海之間上當天心形如偃盖東曰樊桐西曰玄  
圃南曰積石北曰閭苑上有瓊華之闕光碧之堂瑤池  
翠水金井玉彭主鎮星之精居於中元一氣天中焉

野狐嶺

童瑄字碧瑄號玉壺以明天文召入扈從成祖北征至

野狐嶺上有碑識云嶺去天十八里其寒裂膚此地極北紫微北斗已向南觀

大行山

山海經大行山一名五行山列子作大形則行本音也河圖括地象云大行天下之脊郭緣生述征記大行首始河內自河內至幽州凡有八陁崔伯陽感山賦上正樞星下開冀方起為名丘妥為平岡巍乎甚尊其名大行蓋趣韻之誤耳



## 五臺山

史炤通鑑注曰五臺在代州五臺縣山形五峙相傳以  
為文殊示現之處華嚴經疏云清涼山者即代州鴈門  
五臺山也以歲積堅冰夏仍飛雪曾無炎暑故曰清涼  
五峯聳出頂無林木有如疊土之臺故曰五臺古傳云  
山在長安東北二千六百餘里代州之所管山頂至州  
城一百餘里其山左鄰恒山右接天池南屬五臺縣北  
至繁峙縣環基所至五百餘里靈記云五臺山有四埵

去臺各一百二十里據古今所載今北臺即是中臺中  
臺即是南臺大黃尖即是北臺栲栳山即是西臺漫天  
石即是東臺惟北臺中臺古時無異東臺西臺古今無  
別無恤臺恒山頂是也昔趙襄子名無恤曾登此山觀  
代國下瞰東海西曹臺山有宮池古廟隋煬帝避暑於  
此而居因天池造立宮室龍樓鳳閣徧滿池邊號為西  
埵南繫舟山上有銅鑲船軸猶在昔帝堯遭水繫舟於  
此世傳文殊見於南臺號為南埵北有覆宿堆即夏屋

山也後魏孝文皇帝避暑往覆宿此下見雲州謂之北  
埵中臺稍近西北有太華泉有古寺二十餘處東臺去  
太華泉四十二里臺山遙見滄瀛諸州日出時下視大  
海猶陂澤焉有古寺十五處西臺去太華寺泉四里危  
嶺干雲喬林拂日有古寺十二處南臺去太華泉八十  
里最為幽寂有古寺九處北臺去太華泉十二里有古  
寺八處唐末所添寺不在其數五臺縣本漢慮虎音驢  
夷隋大業二年改為五臺縣元遺山五臺山寺詩兜羅

綿界寶光雲雲際同瞻化現身解脫文殊俱有說是中  
知有木強人又云石罅飛泉水齒牙一杯龍焙雪生花  
車塵馬足長橋水汲得中泠未要誇五臺奇勝史炤之  
引遺山之詩如在目中余嘗作臥遊錄錄天下名山五  
臺之文僅此然亦奇傳矣

名山異名

崑崙山一名崑崙君山一名媧宮武當山一名纂嶺普  
陀山一名梅岑青城山一名天谷大復山一名胎簪衡

山一名芝岡東海一名岱淵

岱淵見  
隨巢子

遁甲開山圖曰沙

土之埽雲陽之墟可以長生可以隱居指甘泉谷口也

郭璞注山海經云山川或有同名而異實或同實而異  
名或一實而數名歷代久遠古今變易未得詳也信哉

### 四時山

春山淡冶而如笑夏山蒼翠而如滴秋山明淨而如粧

冬山慘淡而如睡

郭熙

### 四地山

海山微茫而隱見江山嚴厲而峭卓溪山窈窕而幽深  
塞山童頽而堆阜

鞏氏耳目志

鐵圍山

鐵圍山在西天佛經所稱不知的在何處唐初宋昱詩  
梵室開金地香龕鑿鐵圍

天隳山

揚雄蜀本紀曰有王曰杜宇出於天隳山有朱提氏女  
為杜宇妻號曰望帝

楚蒙山

蕭穎士楚蒙山詩尚子捐俗氛季隨躡遐軌季隨即周  
八士之一蒙山有季隨事亦一奇聞也

峨眉山

余書峨眉山寺簡板曰奇勝冠三蜀

晁公武語

震旦第一山

佛經劉東阜云不如以王右軍崑崙伯仲地易奇勝冠三

蜀又半天開佛閣平地見人家老保樓簡板范景仁詩  
也

巫山

巫山者巫咸以鴻術為帝堯醫師生為上公死為貴神  
封於斯山因以名之見郭璞巫山賦

開梅山

宋章惇開梅山詩云開梅山梅山萬仞摩星躔捫蘿鳥  
道十步九曲折時有僵木橫崖顛負麻直上視南岳回  
首蜀道猶平川人家迤邐列板屋火耕礲确名畬田穿  
堂之鼓堂穿壁兩頭擊鼓歌聲傳長藤弔酒跪而飲何



物爽口鹽為先馬卽酣歌苗女和不待媒妁自相牽白  
巾纏髻衣繞顧野花山果青垂肩如今丁口漸蕃息世  
界雖異非桃源熙寧天子厘聖慮命將傳檄令開邊給  
牛貸種使耕墾植桑插稻輸緡錢人人歡呼願歸順裏  
頭異語淳風旋不特得地一千里王道蕩蕩堯為天漢  
皇黷武竟何益性命百萬塗戈鋌李廣自殺馬援死寂  
寞銅柱并燕然伊溪之源最沃壤擇地作邑民爭先大  
開庠序明禮樂撫柔新俗威無專小臣作詩諧樂府梅

山之崖石可鐫此詩可勒不可泯頌聲萬古長潺湲惇  
之此詩專頌開梅山之利又按濟北晁無咎開梅山一  
篇云開梅山梅山開自熙寧之五年其初連峯上參天  
岩崖盤嶮閼羣巒南北之帝鑿混元此山不圯藏雲烟  
躋攀鳥道出蒼蔚下視蛇脊相負緣窮南山南山石室  
大如屋黃閔之記盤瓠行跡今依然高辛氏時北有犬  
戎寇國中下令購頭首妻以少女金盈斗遍國無人有  
畜狗厥初得之病耳婦以盤覆瓠化而走堪嗟吳將軍

屈死狝狝口帝皇下令萬國同事成遠信道不容竟以  
女妻之狗乃負走逃山中山崖幽絕不復人跡通帝雖  
悲思深往來輒遇雨與風更爲獨力之衣短後裙六男  
六女相婚姻木皮草五色文武溪赤髀皆子孫侏離其  
聲異言語情黠貌癡喜安土自以吾父有功母帝女淩  
夷夏商間稍稍病侵侮周宣昔中興方叔幾振旅春秋  
絕筆逮戰國一負一勝安可數邇來梅山恃險阻黃茅  
竹箭如靈雨南人顛踣斃溪弩據關守隘類穴鼠一夫

當其阨萬衆莫能武欲知梅山開誰施神禹斧大使身  
服儒賓客盈幕府檄傳徭初疑叩馬卒歡舞坦然無障  
礙塞石滇溪渚伊川被髮祭一變卒為虜今雖關梁通  
失制後誰禦開梅山開山易防獠難不如昔人閉玉關  
則言不必開蓋因章惇小人專其事為清議所不與也  
然梅山地今為長沙府之安化縣五寨自熙寧至今永  
無蠻獠之患則惇之此舉一秦之長城也不然則為長  
沙之害豈減于廣西之徭獠哉

鮒鰕山陽虛山

山海經鮒鰕山顓頊所葬今在開州陽虛山在玄澗水濱有倉頡二十八字今在商州洛南縣

獨婦山

越絕云獨婦山去會稽四十里勾踐將伐吳徙寡婦至獨山者以為死士示得專一也吳越春秋作獨女山云勾踐以諸寡婦淫泆過犯皆輸山上士有憂思者令遊山上以喜其意按二事吳越春秋所載近是又齊記云

齊有女閭七百徵其夜合之資以充國用論語有歸女樂之文亦出於齊其女閭之餘乎管仲相桓公而立此法宜為聖門之童所羞稱也

火山火井

水經注火山似火從地中出名曰熒臺今南中徃徃有之火井在蜀之臨邛今嘉定犍為有之其泉皆油藝之然人取為燈燭正德中方出古人博物亦未及此也積陽之氣所產固非怪異

山形

銳而出者為虎牙尖而背者為熊耳角而巘者為牛首

冠而峭者為鷄頭

王涯僊掌辨

山岩之異

玲瓏剔透桂林之山也巉嵯窳窳巴蜀之山也綿衍龐  
魄河北之山也俊俏巧麗江南之山也貴州之山灰堆  
糞壤不入詩畫

廬山記

張野廬山記天將雨則有白雲或冠峯岩或亘中嶺俗謂之山帶不出三日必雨

唐詩風吹山帶遙知雨

### 簫山仙室

襄陽記武當山一名簫山又名仙室山望之秀絕極晴而見之輕霄蓋其上白雲帶其前旦必西行夕而東返謂之朝山言為衆山所朝也

### 包山無三班

包山舊無三班謂蛇虎雉也侯景之亂乃有蛇虎或問



雉亦文鳥何以與虎蛇為伍曰雉與蛇交有雉之地必有蛇也

浮玉山陰火

拾遺記西海之西有浮玉山山下有穴穴中有火其色如水波濤灌湯而火不滅名曰陰火木玄虛海賦所云陰火潜然者也然李善及五臣注皆不引之唐詩陰火雨中然顧況詩颶風晴汨起陰火暝潜燒戴叔倫詩古戍陰傳火寒蕪曉帶霜

嵩岑

元魏裴粲傳嵩岑極天苞育名草修生救疾多遊此岫  
魏帝詔之曰栖素雲根餌芝清壑

九曲黃河

河圖緯象曰黃河出崑崙山東北流千里折西而行至  
於蒲山南流千里至於華山之陰東流千里至於桓雍  
北流千里至於下津河水九曲長九千里入於渤海水  
經注曰黃河百里一小曲千里一曲一直新唐書云天

寶中哥舒翰破吐蕃洪濟大莫等城收黃河九曲以其地置西海郡

### 黃河源

按史記云河有兩源一出蔥嶺一出于閼合流東注蒲昌海伏流地中南出積石其山多玉石武帝因按古圖書名河所出山曰崑崙班固以騫為未嘗見崑崙唐薛元鼎使吐蕃自隴西成紀出塞二千里得源於悶磨黎山中高四下所謂崑崙水東北流與積石河相連河源

澄瑩冬春可涉下稍合流色赤益遠他水并注遂濁吐  
蕃亦自言崑崙在其西南故蔡氏尚書禹貢傳兼取二  
說而歸是於薛然皆非耳目聞見之實論元至元十七  
年命都爾蘇佩金虎符往求河源自河州四閱月始抵其  
處學士潘昂霄述其所見為志謂河源出吐蕃朶甘思  
西鄙有泉百餘泓沮洳渙散方可七八十里自上瞰之  
如列星羣流奔轆五七里匯二巨澤自西而東經歷可  
半月合赤賓河其流寢大始名黃河然水猶清又一二

日岐為八九股行可二十日至朶甘思東北有大雪山  
即崑崙也自是凡七八日河水北行轉西崑崙北一東  
北流可二十日至禹貢積石自發源至漢地南北溪澗  
分流合派莫知紀極至積石始林木暢茂及考臨川朱  
思本得譯出梵字圖書其間分合轉折與志或異而崑  
崙積石地域遠近大要相同大槩謂河源東北流所歷  
皆西番地至蘭州凡四千五百餘里始入中國又東北  
流過胡地凡二千五百餘里始考張騫使西域所至惟

大月氏大宛大夏康居其餘旁國皆得之傳聞徒見鹽澤伏流至於積石再出遂謂此為河源誠未覩崑崙班固非之宜矣元鼎雖亦以使事往吐蕃然履歷有序其言崑崙山水委曲可信故蔡傳以元鼎之言為近然亦未究極至元有天下薄海內外皆置驛使通道絕域如行國中都爾蘇又特以河源事往所詣多鄉道指授其所紀載當有證據然後知于闐鹽澤崑崙積石一皆河流所經去源猶遠譬諸常山之蛇張騫見其尾元鼎見其

腹而都爾蘇所至昂霄所紀庶幾見其全體矣雖然中夏  
內事有千人紀者君子所當知中夏外事無預於人者  
君子所當畧故禹貢止書導河積石至於龍門其下經  
過播逆入海之處則備及之意蓋有在矣後世振決蕩  
析河流在中國者代無善捍之策而反遠求其源于荒  
絕之外欲何為邪姑併錄之以具觀考

### 五湖

五湖之說有二周禮揚州其浸五湖范蠡云與我爭三

江五湖之利者非吳耶史河渠書曰於吳則通渠三江  
五湖貨殖傳曰夫吳有三江五湖之利太史公自叙曰  
登姑蘇望五湖此五湖者即具區也其派有五故曰五  
湖一名震澤一名笠澤張勃吳錄云五湖者太湖之別  
名以其周行五百里三萬六千頃故以湖名義興記太  
湖射湖貴湖陽湖洮湖為五湖酈道元水經謂長塘湖  
射貴湖上湖漚湖太湖為五湖張守節史記正義云茭  
湖游湖漠湖貢湖胥湖皆太湖東岸五灣為五湖虞翻



云太湖有五道東通長洲松江南通嘉興非溪西通宜興荆溪北通晉陵馮湖西南通嘉興非溪陸魯望云太湖上稟咸池之氣一水而五名其名大同小異皆禹貢之所謂震澤也王勃文襟三江而帶五湖則摠言南方之湖洞庭一也青草二也鄱陽三也彭蠡一名宮亭湖即禹貢滙澤四也太湖五也吳越春秋五湖貢湖游湖胥湖梅梁湖金鼎湖也韋昭曰胥湖蠡湖洮湖馮湖就太湖而五虞翻曰太湖水通五道謂之五湖陸龜蒙曰太湖上稟咸

池五車之氣故一水五名又楊全五湖賦止為太湖而作周禮揚州之浸曰五湖

三河

唐詩天子三河募少年三河黃河也析支河也湟河也

百川

呂溫地志圖序粉散百川黛凝羣山亦如今地里圖黃為川紅為路青為山也

大江

江出岷山其源實自蜀西戎萬山來至嘉州而沫水自  
舊州合大渡河穿夷界千山以會之至叙州而馬湖江  
會之又十五里而南廣江會之至瀘州而內江又自資  
簡會之至重慶而嘉陵江自利閬果合等州會之至涪  
州而黔江合南夷諸水會之至萬縣而開江水自開達  
等州會之夫然後總而入峽是江自峽而西受大水凡  
八及出峽而下岳陽則會之者洞庭湖所受湖南北諸  
水也又自是而下鄂渚則會之者漢口所受興元諸水

也又自是而下黃州東四十五里則會之者巴河也又自是而下九江則會之者彭蠡今名鄱陽湖所受江東西諸郡水也又自是而下則會之者皖水所受淮西諸水也夫然後總而入海是以自峽而東又受大水凡五畧計天下之水會於江者居天下之半其名稱之大而可考者凡十有三故曰江源其出如甕而能滔滔萬里達海所受者衆也嗚呼問學者可以觀矣

三江

禹貢曰三江既入諸江之說極多國語子胥曰三江環之民無所移常昭注曰三江松江也錢塘也浦陽也秦語云越王擒之於三江之浦范蠡曰與我爭三江五湖之利者非吳與吳越春秋曰范蠡乘舟出三江之口越絕書云出三江之口入五湖之中蔡沈書傳主唐仲初吳都賦注松江下七十里分流東北入海為婁江東南流者為東江并松江為三江張守節史記正義曰三江者在蘇州東南三十里名三江口一江西南上七十里

至太湖名曰松江古笠澤江一江東南上七十里白現湖名曰上江亦曰東江一江東北下三百餘里入海名曰下江亦曰婁江於其分處號曰三江口顧夷吳地記云松江東北行七十里得三江口東北入海為婁江東南入海為東江并松江為三江是也周禮職方氏云揚州數曰具區川曰三江按五湖三江者常昭注非也其源俱不通太湖引解三江既入失之遠矣鄮山黃氏曰世之說三江者甚衆率於地理不合至稅安禮

安禮蜀人地理

指掌圖或以禹貢指掌圖一出指豫章九出彭蠡者為東坡非也

南江以足經文中江北江之數其論始定然審如其說於震澤何關耶其曰歷丹陽毗陵入今大江者為北江首受蕪湖東至陽羨者為中江分於石城過宛陵入具區者為南江三江在震澤上下而皆入海其說似矣然丹陽毗陵之入江者特港脉一二詎應影附大江而謂之江而首蕪湖分石城之二水皆在震澤上流又可以入海言耶以今所見受震澤水東入於海者惟吳松一

江不見其三也舊有安亭一江由青龍鎮入海閭利者慮其走商稅塞之又有白蜆一江以通青龍今亦塞而耕稼之王半山送裴如晦出宰吳江詩曰當知耕牧地徃徃芟蒲青三江斷其二洪水何由寧豈禹三江之舊迹在是有可訪而復之者耶抑水之為水有源有委舊說具區三萬六千頃積之既多泄之已難矣熙寧八年旱太湖淺露見丘墓街井是昔為高原今為污澤也湖之浸淫又不知其比舊增多幾千頃非源委之不究而



致然耶

慎

按蔡沈黃震之說皆於下流求之名以地訛

號隨世改恐非禹貢三江之說也曷於上流發源求之  
徐鉉注說文云江出岷山至楚都名南江至潯陽為九  
道名中江至南徐州北江入海郭璞山海經注岷山大  
江所出也岷山南江水所出也岨山北江水所出也三  
江皆發源於蜀而注震澤禹貢紀其源而及其委耳豈  
區區為吳地記其瑣瑣改易不常之名乎觀禹貢三江  
之說當以此意求之則予之言雖大禹復生不能易矣

蜀之三江

蜀之三江外水岷江中水涪江內水沱江也

墊江之源

蔡松年補南北史志載吐谷渾酋長阿豺登其國西疆山觀墊江源問其羣臣曰北水流更有何名由何郡國入何水也其長史魯和曰此水經仇池過晉壽出宕渠始號墊江至巴郡入江度廣陵會於海阿豺曰水尚知歸吾獨無所歸乎乃遣使南通於劉宋貢方物宋少帝

封為澆河公按此稱墊江非今忠州之墊江也古之墊江即今合州也合州置於西魏隋煬帝改合州為涪陵而移墊江之名於忠州之桂溪今之墊江則古之桂溪也近日一統志亦草草混淆因書墊江源併及之按墊江之源乃在吐谷渾之西疆山今其地不在中國不可考究

### 怒江

唐地理志安南通天竺道自羊苴咩城西至永昌故郡

三百里又西渡怒江至諸葛亮城二百里羊苴咩今在  
大理怒江今在騰越怒江江波洶湧如怒也或作露江  
非

四海

東海之別有渤海南海之別有漲海西海之別有青海  
北海之別有瀚海猶五岳之外有五鎮也

裨海

說文裨接益也以小益大曰裨西域傳有裨王漢書有

裨將鄒衍書四海之外有裨海環之書名有裨蒼裨雅皆以小益大之義

西海

丘文莊公曰自漢南越入中國始有南海然西海竟不知所在今祀東海於登州祀南海於廣州皆臨海而祭西海則望祀於蒲州北海則望祀於懷慶蓋因宋都汴而懷慶在其北是時失幽燕無因至遼薊之間而北望以祭之可也國朝都燕而乃往南以祭北

海可乎古謂青州為北海郡今京師東北乃古碣石  
淪海之處於北立祠為宜滇之極西百夷之外聞有  
大海通西南島夷即西海也宜於雲南城望祀之

慎

按王莽立西海郡於西寧之地亦妄也今滇西百夷  
之外有大海在今阿瓦地沐璘為都督曾至其地有  
詩云蛇首樓船十丈長船頭鑊鼓樂笙簧篙師百櫓  
齊搖去阿瓦城邊水似湯即西海無疑矣又按王充  
論衡云漢得西王母石室因立西海郡而漢書不載

其事今其地沒於匈奴矣柳子厚鏡歌題云李靖滅吐谷渾西海上

熱海

岑參熱海行云蒸沙爍石然虜雲沸浪炎波煎漢月此循名想說之誤參雖仕從邊幕亦未嘗親到熱海也按玄奘西域記云凌山葱嶺北隅坎雪積凌春夏不解懸釜而炊席冰而寢七日出山有一清池亦曰熱海以其對凌山不凍故得此名其水未必溫也玄奘蓋躬至目

見非參想像之詞耳

丘處機論海潮

海潮人皆言因月唐盧肇獨言因日余嘗遊海上詢其故老甚見分明月初出則潮初上月卓午則潮滿月西轉則潮漸退月沒則潮退盡北方月出則潮復上斗北月中則潮滿月東轉則潮漸退月沒則潮退盡盧肇言日是太陽水是純陰日西入地時陰避太陽東海潮上日出時水乃西流東海潮下且箭之急疾晝夜不能行



萬里如何海之深濶洪波蕩漾日夜能行數萬里乎又  
肇之所言晝夜方是一潮知肇不曾海上遊行其文輕  
進朝臣無有詰難者蓋世間之事強辯者為勝自非聖  
達誰能窮理盡性哉余要魯較勘東萊與膠西陸地相  
去二百里許水行迂曲則千里許潮信不同萊北潮上  
即膠西潮下膠西潮上即萊北潮下北到南海約近萬  
里據大體北海潮上則江淮已北皆潮滿南海潮上江  
淮已北皆潮下即是如何登萊即墨盈縮不同又見四

方大海潮流各異耳世間之事尚不能究况天外之事  
乎大抵海水盈縮譬乾象縱橫耳於理則無有邊際隨  
風飄蕩莫能定准何乃晝夜循環不差度數亦聖功道  
力不可思議耳丘長春之說如此可與盧肇余靖及天  
原發微之說相參互故備錄之然潮亦有不可知者如  
錢鏐射潮而潮退西陵元兵駐錢塘沙上三日而潮不  
至似有神司之不可以常理推也

海影翻

人家壁上或見塔影樹影而不知塔與樹所在此理不可曉又有見塔影樹影皆倒懸尤不可解段成式云海影翻側如此理或然也蓋海光映日數千里皆見塔樹影本直影又重影勢必倒也

閭水即漾水

通鑑六十七卷劉璋將扶禁帥萬餘人由閭水上注閭水即西漢水禹貢所謂嶓冢導漾東流為漢者也余昔年著古音畧以浪漾為一水吳中陸貞山祭駁之以為

誤蓋未嘗考此也

外水內水中水

宋劉裕遣朱齡石伐蜀寇譙縱衆軍悉從外水取成都  
臧儔從中水取廣漢老弱乘高艦從內水向黃虎史炤  
通鑑釋文曰巴郡今之重慶正對二水口右則涪內水左則

蜀外水自渝上合州至綿州曰內水自渝上戎瀘至蜀

謂之外水

慎

按外水即岷江自重慶上叙州嘉定是也

內水即涪江自重慶上合州遂寧潼綿是也中水即沱

江自瀘州上富順資簡金堂漢州是也曰四川者則取  
岷江沱江黑水白水四大川以為名爾

沈約宋書資江為中水涪江為

內水

### 八功德水

八功德水一清二冷三香四柔五甘六淨七不噎八除  
病

### 丁字水

杜牧睦州詩疊嶂巧分丁字水按水經丁溪水在泗水

東泗水冬春淺澀常排沙通道陸機賦所謂乘丁水之  
捷岸排泗川之積沙是也

十二月水

正月解凍水二月白蘋水三月桃花水四月瓜蔓水五  
月麥黃水六月山礬水七月豆花水八月荻苗水九月  
霜降水十月復槽水十一月走凌水十二月感凌水見  
九州記

苦水變甘泉

李錫之為蘆城令變苦泉為甘泉凡水之性味色香出沒顯伏皆地脉之異有所產歟惠州之佛疏院東熱泉湯如也西冷泉雪如也

濡水

濡水有二乃官切一出涿郡固安縣與易水合而注於海馬水此一濡水也一發原於遼西塞外過海陽入於海此一濡水也

蜀江水路險名

江自嘉州至荊門名灘險地凡千百餘舟人一一能言

之其灘之外有洞有磧凡數十皆見於字書今載其畧

洞疾流也

江中有達洞構木洞

水流沙上曰瀨

江中有和尚瀨

水出尾下

曰瀟

今地名七瀟

回流旋轉曰漩

今有南陀三漩

石積水淺曰磧

今有

上磧

水疾崖傾曰礧

今有閭王礧燕子礧

灘磧相湊曰湫

音子今有石扼

子折

水如轉轂曰漕

今有野猪漕

水漫不流曰沱潭下急流

曰灘其名尤多不盡書也

遠水如岸



海濱之人曰遠望海水似高於地有如岸焉蓋水氣也  
煬帝望海詩曰遠水翻如岸遙山倒似雲

升菴集卷七十六

欽定四庫全書

升菴集卷七十七

明 楊慎 撰

石熊峯滹沱河考

恒山之陽有巨川焉曰滹沱源出代郡秦戲山下匯為  
三泉流稍延曼循太行掠晉冀蜿蜒而東注之海按班  
固叙禹貢九河所謂徒駭者也至宋蔡沈疑之蓋惑於  
夾石碣石入於河之說遂以九河淪於海滹沱中高不  
與大河相涉然所謂九河者亦猶九川云爾豈謂大河

播為九乎故知山川經絡苟非目覩身歷而欲據文字定之鮮有不失者矣

濟源

戰國策注濟水出常山房子縣贊皇山東至鉅鹿癭陶縣入泚索隱曰濟水出河東王屋山其流至濟陰應劭云濟水出平原陰縣東三說不同何也蓋濟水伏流或隱或見三家各以所見為出處爾

東流不溢

楚辭天問東流不溢孰知其故柳子之對朱子之註大抵以歸墟為說余謂水由氣而生亦由氣而滅今以氣噓物則得水又以氣吹水則即乾由一滴可知其大也歸墟尾閭是水之大窮盡氣之大升降處山海經云汜天之山赤水窮焉不姜之山黑水窮焉乃塗之山青水窮焉白水之山白水窮焉不庭之山滎水窮焉成山甘水窮焉則衆流各有窮處至此即化氣而升不必至歸墟也又莊子云日之過河也有損焉風之過河也有損

焉風日皆能損水但甚微而人不之覺若曝衣於日中  
標濕於風際則立可驗此隨時而消息也覆杯水於坳  
堂則立而晷洒激泉於焦原則立而涸此隨地而消息  
也蓋二氣迭運五行更勝一極不俱備一物不獨息端  
指何地為歸墟邪

祝融之汪

楊誠齋擬大招懷東坡詞歷九州而猶礙兮誕寘之祝  
融之汪按祝融之汪謂南海也左傳雍氏之汪服虔注

停水曰汪楚謂之汪閩謂之洋

寶盃泉

寶盃泉在江州徐陵文泉流寶盃遙憶湓城峯號香爐  
依然廬岳

半月泉

會稽天依寺有半月泉泉隱岩下雖月圓滿望池中只  
見其半最為佳處有僧鑿開岩名滿月殊可惜也因作  
殺風景一絕云磨墨濃填蟬翅帖開半月岩為滿月富

翁漆卻斷紋琴老僧削圓方竹節

溫泉

東坡詩記所經溫泉天下七處以驪山為最予在南中所見又不止七處也寧州白崖德勝關浪穹宜良鄧川三泊凡數十處而安寧為最凡溫湯所在下必有硫黃其水猶有其味獨安寧清徹見底垢自浮去不積且無硫黃氣不知何理也舊有人見其竅出丹砂數粒乃知其下有丹砂傳聞徽州黃山溫泉亦類此後周王褒溫



湯銘云白礬上徹丹砂下沉華清駐老飛流瑩心乃知  
溫泉所在必白礬丹砂硫黃三物為之根乃蒸為暖流  
耳

瀑布泉

瀑布泉詩人盛稱廬山鴈蕩亦有之地志云廬山循崖  
直下不如鴈蕩之飛墜飄散而可觀也吾蜀梁山縣蟠  
龍山有之與鴈蕩相似靳兩城云大勝廬山有詩云神  
女碧瑤簪明珠構瓔珞纖手按鐘球鈞臺響天樂仙人

環珮玉珊珊曉跨蒼龍謁帝關醉舞婆娑渾忘却天風  
吹掛翠微間

龍湫瀑布

唐僧貫休詩鴈蕩經行雲漠漠龍湫燕坐雨濛濛所謂  
雨者非雨也瀑布之濺沫也按鴈宕志云西谷龍湫如  
井狀檻中作凹石壁數仞水從凹中瀉下望之若懸布  
隨風作態遠近斜正變幻不一或如散珠如驟雨如飛  
雪如輕烟濛霧或飄轉中斷或左右飛散或直下如注

雷或屈曲如蜿蜒觀者每立於潭外相去數十步水忽  
轉舞向人亂洒衣帽沾濕或大注如晴雷或為風所遏  
盤桓而不下皆奇態也匡山視此不及遠矣彼以名聞  
天下者路當要區耳按此段奇景披志見之亦爽心目  
况親至之乎可入卧遊錄

迷子洲

王半山詩洲迴藏迷子溪深礙若耶迷子洲在建康西  
南四十里

鸚鵡洲

王僧虔傳侯景寇夏首有龍五色入城前鸚鵡洲水中

十七阨

可對百二關

子胥諫吳王曰齊晉山居陸處豈能越十七阨以有吳哉

三鵝路

可對五鹿沙

元魏西郢羣蠻反斷三鵝路按三鵝在汝州古繞角城春秋傳繞角之役是也項城縣為第一鵝分嶺山為二

鵝汝州為三鵝也唐詩三鵝水上一歸人

鬼乘龍

周世宗征濠夜遣兵持炬乘橐駝絕淮濠兵驚以為鬼  
乘龍也今名乘龍洲在鳳陽

寰宇志

汶即岷

蜀山之大者曰岷山其川曰岷江岷字說文作𡵓省作  
岷漢人隸書作汶多與汶上之汶相混列子貉不踰汶  
謂川江也非汶上也殷敬順已辨之史記冉駹為汶山

郡司馬溫公類篇曰汶音岷據中記引禹貢岷嶓旣藝  
及岷山之陽及岷山導江皆作汶蓋古字通用也三國  
志蜀後主至湔登觀坂觀汶水之流王右軍與周益州  
撫書曰要欲一遊目汶嶺五代史蜀主王建貶衛尉少  
卿李錡為汶川尉徐無黨注汶讀作岷而今汶川縣誤  
呼作問音蜀焉得齊南魯北之水乎

叙州驛名汶川  
考古志作湔川

### 水關河僵

國語曰穀洛鬪將毀王宮注不言其鬪之狀宋紹興十

四年樂平水關有司奏言何衝里田水中類為物所吸聚為一直行高平地數尺不假隄防而水自行里南程氏家井水溢亦高數尺天矯如長虹聲如雷穿墻毀樓二水關於杉墩且前且卻約十餘刻乃解以後印前穀洛二水之鬪應亦如此也正德中文安縣水忽僵立是日天大寒遂凍為冰柱高五丈四圍亦如之中空而傍有穴後數日流賊過文安鄉民入冰穴中避之賴以全者頗多土人謂之河僵亦前史罕見也

海船候氣

海船候氣見黃氣知有人烟國土見白氣知有山峯巖壑見黑氣水也

鞠旅滇池

陳霸先九錫文曰鞠旅滇池之南陳師桂嶺之北

以此考之

霸先魯至滇矣

鴈塔猴池

王勃寺碑高臺與鴈塔俱平曲岸與猴池共盡佛有五



精舍獼猴江其一也

金庭玉柱

林屋洞天在包山其中深窈幽黑久無遊者徐武功好  
竒列炬而行行頗久至一處平敞寬崇四壁上下皆作  
金色石乳自上滴下謂之金庭玉柱也有刻字曰隔凡  
字勢飛逸疑非人間書

盤渦

蜀江三峽中水波圓折者名曰盤渦音漩詩盤渦驚浴

底心性張贍黃牛峽詩盤渦逆入嵌空地斷壁臺分縹  
繞天

沙

水邊地可耕曰沙金陵有白沙徽州有錦沙楚有長風  
沙秦塞有穆護沙佛經有毗沙瓶沙

沙城

三國志婁伯子築沙城俞亮角詩榆葉沙城冷梅花水

國偏

天池天塹天藏

海曰天池江曰天塹鹽曰天藏

星牖月窻

凡山洞岩穴有竅通明小者曰星牖大者曰月窻

拒雲槃日

瀟山一名天柱山三峯鼎峙拒雲槃日

神囂仙的

梁宣帝七山寺賦神囂岵岵而獨立仙的皎皎以孤臨

壑之凸凹者曰囂峯之尖射者曰的

枝峯蔓壑

陸魯望云金華山枝峯蔓壑秀氣旁魄不啻神仙登臨

鬱鬱葱葱

光武紀有望春陵氣者曰咎佳哉氣鬱鬱葱葱陸佃曰  
鬱鬱塞也葱葱通也言其氣塞而通矣列子美哉國乎  
鬱鬱芊芊鬱鬱森幽也芊芊茂盛也

魚齒獸角

庾信哀江南賦地平魚齒城危獸角左傳涉於魚齒之下注魚齒山名見呂氏春秋猛獸以尾為旌以角為城

馬齒魚鱗

州疆馬齒候館魚鱗宋人四六語也應璩詩九州相錯雜相次如馬齒韓文公詩候館若魚鱗

岌岌宮霍

爾雅小山岌岌大山岷邢昺疏云言小山與大山相並而小山高過於大山者名岷非謂小山名岌大山名岷也

又大山宮小山霍疏云宮猶圍繞也謂小山在中大山  
在外圍繞之若此者名霍非謂小山名宮大山名霍也  
爾雅文既奧妙而邢疏解之具析其微矣所以兩發其  
義而不厭重複者正慮後人誤認也近時有刻爾雅而  
去疏者曰我自能解不必觀疏試以此問之果誤認如  
邢所譏此小兒強作解事者

度索尋橦

西域傳有度索尋橦之國後漢書跋涉懸度注溪谷不

通以繩索相引而度唐獨孤及招北客辭竿復引一索  
其名爲竿人懸半空度彼絕壑予按今蜀松茂之地皆  
有此橋其河水險惡旣不可舟楫乃施植兩柱於兩岸  
以繩絙其中繩上有一木筒所謂橦也欲度者則以繩  
縛人於橦上人自以手緣索而進行達彼岸復有人解  
之所謂尋橦也非目見其制不知其解獨孤及之文以  
十七字形容之西域傳只四字盡之可謂工妙矣

甌窰汚邪

史記甌窶滿溝汚邪滿車注甌窶猶培塿也左傳培塿  
無松栢荀子注引說苑螭螺者宜禾汚邪者滿車螭螺  
之背微高原田之形似之班固所謂原隰龍鱗也汚邪  
隰田也荀子大畧篇流丸止於甌史注地之坳坎如器  
之甌史甌史窰下之地史記甌窶滿溝汚邪滿車甌窶  
傾側之地汚邪下地也邪與史聲相近蓋同也余詳錄  
此愛二句用韵之妙窶叶溝邪叶車一音也螭螺叶禾  
汚史叶車音居又一音也事雖一事而所聞異辭故書之



異字而文藻各妙甌如甌史之甌窶如窶藪之窶當是  
傾側窳下之地故曰滿溝培塿之說非是也鰕鰲自是  
高地故曰宜禾乃可以培塿原田解之各自不妨所謂  
合之則兩傷離之則雙美也原鰕可對地蛇見莊子

九折坂七勝城

九折坂在黎州七勝城在三峽口陵法和所立

東漢西漢

祝穆曰天下之大川以漢名者二班固謂之東漢西漢

而黎州之漢水源於飛越嶺者不與焉固之所謂東漢則禹貢之道漾自嶓冢山逕梁洋金房均襄郢復至漢陽入江者也西漢則蘇代所謂漢中之甲輕舟出於巴乘夏水下漢四日而至五渚者其源出於西和州徼外徑階沔與嘉陵水合俗謂之西漢又徑大安利劒果合與涪水合入於江

南夢北夢

子產相楚楚子享之賦吉日王以田江南之夢注楚之

雲夢跨江南北地故有南夢有北夢五代孫光憲號北

夢本此浯水有南浯北浯北浯在瑯邪靈門南浯在九

疑零陵冀州之浸曰潞有東潞西潞東潞今之張家灣

潞河驛西潞山西之上黨也東陽今之金華西陽今之

黃州山海經注東甌今之永嘉在岐海中西甌即閩越

今之建安亦在岐海中山有東吳西吳西鎮吳山在隴州水有

東漢西漢見蜀志蜀有上雒下雒上雒新都下雒中江庸有上庸下

庸上庸金州下庸夔州

蔡元定地理

蔡元定自言其歷學之精謂秦漢以來皆不分明遂改秦漢以下之法然而未試元郭守敬謂蔡亦大言若秦漢之人皆不分明日月之食何以準也其論地理為葉水心所譏謂其自塋壞祖墳又誤許多士夫家改塋無以異於鑽利之山人其著律呂書又為元人及近日著律呂元聲有異同皆難憑據愚謂歷術地理律呂皆難憑據目前無限事業棄之不理而治此難知難明之事

何益哉

地誌

今之瓜州非允戎之瓜州今之南陽非晉啓之南陽今

之鎬非來歸之鎬今之平陸非孟子之平陸

唐天寶中鑿月河得

古鐵上有平陸二字明皇改河北縣為平陸縣

今之新都非王莽所封之新都

王莽新都在南陽見後漢書志注

治水

宋太祖曰夏后治水但言導河至海隨山濬川未聞力

制湍流廣營高岸自戰國專利堙塞故道以小妨大以私害公九河之制遂隳歷代之患弗弭神宗曰後世以事治水故常有礙以道治水無違其性可也如能順水所向遷徙城邑以避之復有何患雖禹復生不過如此歐陽修曰開河如放火又曰避高就下水之本性河流已棄之道自古難復文彥博曰河不出於東則出於西利害一也今發夫修治徙東徙西何利之有自古治河之說多矣若宋二帝之見二臣之言可為百世法

水經注

水經注所載事多他書傳未有者其叙山水奇勝文藻駢麗比之宋人臥遊錄今之玉壺冰豈不天淵予嘗欲抄出其山水佳勝為一帙以洗宋人臥遊錄之陋未暇也又其中載古歌謠如三峽歌云巴東三峽巫峽長猿啼三聲淚沾裳又云朝見黃牛暮見黃牛三朝三暮黃牛如故又云灘頭白勃堅相持倏忽淪沒別無期記轅道謠云檣溪赤木盤蛇七曲盤羊鳥櫟勢與天通皆可

以入詩材勝俗子看韻府羣玉遠矣

無定河

輿地廣記唐銀州東北有無定河卽固水也後人因漬沙急流淺深不定故更今名唐陳祐詩無定河邊暮笛聲赫連臺畔旅人情玉關歸路千餘里一夜秋風白髮生又陳陶詩誓掃匈奴不顧身五千貂錦喪胡塵可憐無定河邊骨猶是春閨夢裏人

渡瀘辯



孔明出師表五月渡瀘今以為瀘州非也瀘州古之江陽而瀘水乃今之金沙江即黑水也其水色黑故以瀘名之爾沉黎古志孔明南征由今黎州路黎州四百餘里至兩林蠻自兩林南瑟瑟部三程至雋州十程至瀘水瀘水四程至弄棟即姚州也今之金沙江在滇蜀之交一在武定府元江驛一在姚安之左卻據沉黎志孔明所渡當是今之左卻也瑟瑟一作虱瑟兩林今之邛部長官司也

胸忍辯

漢地理志有胸忍縣顏師古注音劬誤也按說文胸腊挺也其俱反字既從句與地名何干通典作胸腮胸音如順切腮如尹切讀如閏蠢通典之音得之矣而字作胸則因漢志而誤也當从胸乃叶閏字之音胸腮蟲名夔州地多此蟲遂以為名又謂胸腮屬漢中亦誤檢地志漢中實無此縣雲安之西三十里萬戶驛下橫石灘上土人云驛之左右胸腮故地也辯文字與辯職方者

宜知之古李巽巖胸忍辯可謂互證練考千古之謬矣  
夫以二字之微以師古許慎杜佑三家尚有誤舛今之  
不悅學者乃以漫浪視之幾何不為伏獵侍郎乎

右軍帖

王右軍與謝安書云蜀中山川如岷山夏含霜電校之

所聞崑崙之仲也

見輿地志

朗公谷

太山朗公谷舊名琨瑞溪車頻泰書云沙門竺朗碩學

淵通尤明氣緯隱居此谷嘗從隱士張巨和遊巨和常  
穴居而朗居琨瑞小大起殿舍連樓疊閣雖素飾不同  
並以靜外致稱



升菴集卷七十七

欽定四庫全書

集部  
升菴集卷七十九

詳校官監察御史臣劉芬

中書<sub>臣</sub>劉源溥覆勘

總校官原任中允<sub>臣</sub>王燕緒

校對官編修<sub>臣</sub>勵守謙

謄錄監生<sub>臣</sub>林紹龍

欽定四庫全書

升菴集卷七十八

明 楊慎 撰

禹生石紐

易林大禹生石夷之野後漢戴叔鸞傳云大禹生西羌水經注禹生於蜀之廣柔縣石紐村今之石泉縣也石紐村今之石鼓山其山朝暮二時有五色霞氣又有大禹採藥亭在大業山其地藥氣觸人往往不可到地志不載聞之土人云

墳墓字異

方言凡塋無墳者謂之墓有墳者謂之丘檀弓古者墓而不墳也邯鄲淳曹娥碑丘墓起墳蓋言丘其平墓而為高墳也後世以墳墓混為一遂疑其重複改為立墓起墳非也曾見上虞謝狷齋為予言此

倉頡冢

倉頡冢方輿勝覽有數處當以關中馮翊今耀州者為是按皇覽云有倉頡冢在利陽亭南高六丈又聞人年

準作衛覬碑文云倉頡冢碑大篆書在左馮翊利陽亭南道旁顓金針八分書也

女媧墓

舊唐書天寶十一載六月闕鄉縣黃河中女媧墓因大雨晦冥失所在至乾元二年六月瀕河人聞有風雷曉見其墓湧出下有巨石上有雙柳時號風陵堆蓋女媧亦風姓也事又見喬潭所撰女媧陵記千萬年後靈異如此補天之說亦或不誣乎



成湯墓

劉向奏議云殷湯無塋處失考也後世羅泌路史遂傳會其說按楊誠齋揮麈錄云殷湯塋寶鼎縣今汾州也古尚書注桐宮在湯墓側桐宮今在汾州與寶鼎縣之說相合

郭璞墓

郭璞善地理凡遇吉地必剪爪髮以瘞之故郭璞墓所在皆有

玉女房

梁李公肩益州記云灌江西玉女房下作三石人於白沙郵郵在堰官上立水中刻石要江神曰淺無至足深無沒腰又教民檢江立堰之法曰深淘灘淺築堰

河圖緯

茅山志引河圖要元篇云勾金之壇其間有陵兵病不起洪波不登又曰乃有地脉土良水清勾曲之山金壇之陵可以度世上昇曲城要元篇蓋漢世緯書後漢書

志注不載其目僅見此焉

驅山鐸

太湖西有岵嶺山有石如卷笮相傳云禹所用牽山笮也會稽又有驅山鐸二事與秦王鞭石成橋相類好怪者傳會之說邪抑古元有此術也

都鄙

都何以訓美都者鄙之對也左傳曰都鄙有章淮南子云始乎都者常卒乎鄙蓋天子所居輦轂之下聲名文

物之所聚故其士女雍容閒雅之態生今諺云京樣即古之所謂都相如傳車從甚都是也邊氓所居叢爾之邑狐狸豺狼之所嗥故其閭閻各嗇村陋之狀出今諺云野樣即古之所謂鄙老子云衆人皆有以而我獨頑似鄙是也

郡縣

說文曰郡制天子地方千里分為百縣縣有四郡故春秋傳曰上大夫縣下大夫郡至秦始皇置三十六郡以監

縣矣邑君聲釋名郡羣也人而羣聚也黃義仲十三州  
記曰郡之言君也改公侯之封而言君者至尊也郡守  
專權君臣之禮彌崇今郡字君在其左邑在其右君為  
元首邑以載民故取名於君謂之郡漢官曰秦用李斯  
議分天下為三十六郡凡郡或以列國陳魯齊吳是也  
或以舊邑長沙丹陽是也或以山陵太山山陽是也或  
以川原西河河東是也或以所出金城城下得金酒泉  
泉味如酒豫章樟樹生庭鴈門鴈之所育是也或以號

令禹合諸侯大計東治之山會計國名會稽是也風俗  
通曰百里曰同總名為縣縣玄也首也從系倒首言當  
玄靜也釋名又曰縣也懸於郡矣黃義仲十三州記曰  
縣絃也絃以其直言下體之居隣民之位不輕其誓施  
繩用法不曲如絃絃聲近縣故以取名

### 棧道

顏師古曰棧即閣也劉禹錫有山南西道新修驛路記  
有云我之提封距右扶風觸劍閣千一百里自散關抵

褒城次舍十有五自褒而南踰利州至於劍門十有七  
道塗次舍可見於此又云棧閣凌虛下臨哈呀層崖峭  
絕朽木垣鐵因而廣之限以鈎闌狹徑深陁從而拓之  
方駕從容棧閣之制亦可想也歐陽詹棧道銘有云秦  
之坤蜀之艮連高夾深九州之險也大抵漢中雖是平  
川東北入長安西南出劍門皆有棧閣之路惟今洋州  
子午谷南北正對長安王莽所開唐明皇荔枝路老杜  
云百馬死山谷至今耆舊悲信為險絕

離堆

全蜀舊志言離堆在灌縣謬矣按史記蜀守李冰鑿離

碛

古堆字

避沫水之害按沫水出蜀西南徼外下雅州過

嘉定名三江口順流而下叙州重慶安得逆上數百里而害灌縣哉按元和郡國志李冰鑿離堆在雅州離字訛為雅此可證矣千載未有知其誤蓋李冰穿三江於灌口廟食于此後人遂以離堆之名移之灌縣耳

劍門



王全斌伐蜀自益光江趨來蘇徑不由劍門入是劍門外又別有一路也

壞井田

世儒罪秦廢井田不知井田之廢始于管仲作內政已漸壞矣至秦乃盡壞耳元陳孚題管仲井詩畫野分民亂井田百王禮樂散寒烟平生一勺潢汙水不信東溟浪沃天可謂閨幽之論又九河之壞亦自管仲始詩緯所謂移河為界在齊呂是也

井田

中郎區博諫莽曰井田雖聖王法其廢久矣周道既衰而民不從秦知順民之心可以獲大利也故滅廬井而置阡陌遂王諸夏迄今海內未厭其敝今欲違民心追復千載絕迹雖堯舜復起而無百年之漸弗能行也天下初定萬民新附誠未可施行區博之言特告王莽非其人而其實至論也後世儒者必欲行井田何哉

井田

漢食貨志云后稷始耨田以二耜為耦廣尺深尺曰耨  
顏籀云耨者田中溝也田溝之法耜廣五寸二耜相耦  
一耦之伐廣尺深尺謂之耨六耨而為一畝耨即畝也  
呂覽引后稷書曰能使吾土靖而耨浴土乎又曰上田  
棄畝下田棄耨又耜博八寸所以成耨也又曰畝欲廣  
以平耨欲小以深以此證之則漢志言耨田始于后稷  
有徵齊民要術又載伊尹耨田法制大抵從后稷其稱  
伊尹者豈尹嘗用后稷之法以訓民乎

# 葑田

葑田江淮以南有之淮南子大旱菰封燠菰即菰封即葑也旱燥故菰封亦乾也菰葑根相結而生歲久浮於水上根最繁而善糾結以土泥著上刈去其蔓枯時以火燎便可耕種吳閩閩十三州志云百粵嶺南有駱田駱音架王氏農書架田即葑田以木縛架為曲田浮水面以葑泥附木上而成田其田隨水上下故南方有盜田之訟也○按葑田自古有之周禮三農鄭氏注云三

農山農澤農平地農澤農即種下隰及葑田者也又云  
澤草所生種之芒種郭璞江賦云標之以翠翳泛之以  
游菰播匪蓺之芒種挺自然之嘉蔬鱗被菱荷攢布水  
菰翹莖瀟瀟濯穎散裹隨風猗萎與波潭沲流光潜映  
景炎霞火此十一句皆指葑田言也不然則隨風與波  
之句何所指乎景炎霞火即海賦所謂陰火潜然也草  
木之根汨泥與沙浮於水中遇夜則生光管寧浮海附  
陰火之光彩是也

溝瀆

易坎為水又為溝瀆欲行水者用溝所以為滂之備欲  
停水者用瀆所以為旱之備溝之一字从冎冎之為言  
搬也去水之害如搬棄也瀆之為字从賣賣之為言櫝  
也鍾水之利如韞櫝也矯揉水之性而為溝瀆亦猶矯  
揉木之性而為弓輪聖人所以範圍五行而曲成萬物  
也周禮考工記凡溝逆地防謂之不行水属音注不理  
遜謂之不  
行又曰梢溝三十里而廣倍又曰凡行奠水磬折以參

伍所謂水屬者屬溝洫也所謂梢溝者溝末也溝遠而不倍不足以容水水行不罄折不足以殺其勢觀黃河千里一大曲百里一小曲則溝洫之罄折可知矣是雖矯揉亦出自然反是則漢之鴻隙陂梁之浮山堰矣孟子所言過顙在山非止為喻蓋桔槔斗古有為之者漢陰丈人所以目之為機事也

陽燄

素問云澤中有陽燄如火烟騰騰而起於水面者是也

盖澤有陽燄乃山氣通澤山有陰靄乃澤氣通山

陰火

海中漉出魚蜃置陰處有光初見以為怪嘗推其義盖  
鹹水所生凡海中水遇陰晦波如然火滿海以物擊之  
迸散如星有月即不復見木玄虛所云陰火潜然豈謂

是乎

嶺表  
錄異

左擔

杜少陵愁坐詩云葭萌氏種迴左擔犬羊屯葭萌左擔



皆地名葭萌人皆知之左擔人罕曉也太平御覽引李  
克蜀記云蜀山自綿谷葭萌道徑險窄北來擔負者不  
容易肩謂之左擔道解者數十家無一知者又妄易左  
作立可笑

又益州記陰平縣有左擔道其路至險自北  
來者擔在左肩不得度右肩也陰平在今之

縣文

### 康浪

甯戚飯牛歌康浪之水白石爛康浪水在今山東見一  
統志可考今樂府誤作滄浪之水滄浪在楚與齊何干

涉也駱賓王文云觀梁父之曲識卧龍於孔明聽康浪之歌得飯牛於甯戚此可以證近書坊刻駱集又妄改康浪作康衢自是堯時事與甯戚何干涉也

### 鬼方

高宗伐鬼方之事惟見於易鬼方極遠之國即莫靡之屬也蒼頡篇曰鬼之為言遠也世本黃帝娶於鬼方氏漢匡衡疏云成湯化異俗而懷鬼方意者湯時鬼方已內屬於式園之中而復叛於中衰之日故高宗伐之以

中興殷道也又西羌傳曰殷室中衰諸侯背叛至於武  
丁征西戎鬼方三年乃克故其詩曰自彼氐羌莫敢不  
來王是其証也竹書紀年周公伐西洛鬼戎按今貴州  
有羅鬼夷俗又呼貴州為鬼州楚詞得人肉而祀以其  
骨為醢紂醢脯九侯亦效夷虐也今貴州以牛馬骨漬  
之經年候其柔脆如笋其氣逆於人鼻以為上品供客  
謂之賈鬼賈閤字上聲呼亦此類也

桂竹

零陵記云桂竹之野產桂竹來風防露上合下疎每日  
一出羅紈金翠按其地今之貴州也初名桂竹之野竹  
譜作笙竹後訛為貴竹今又訛竹為州云

澆澆

澆澆涔澆澆澆澆皆水聲也

斟溪

王韶之始興記連州水下流有斟溪一日十溢十竭安  
寧州有潮泉一日三溢三竭貴州城外有漏洩一日百

盈百涸應漏刻焉

盧罽

吳起云夏桀之國盧罽在其北伊洛出其南注云盧罽地名慎按北方謂水黑曰盧罽即古臯字盧罽即盧溝也溝與臯音相近桀都安邑盧溝正在其北盧罽盧龍皆北方水名又湛盧劍名言湛然如水黑也盧橘亦以色黑名之可以互證

石漆

延州高奴縣有石脂水水膩浮水面如漆採以膏車及  
炷燈謂之石漆宋時用以燒煙造墨謂之延州石液刻  
於墨上與近日蜀中火井及出硫黃油皆異產也

### 影國

後梁為北魏影國猶云附庸

### 三關

元志云燕有三關曰松亭關

今之倒馬關

曰古北口曰居庸

關周世宗一日下三關在顯德六年遼之應歷九年也

其三關則益津關

今之霸州

瓦橋關

今之雄縣

淤口關

今之河間

會有

疾而還遼之氣運未終乎世宗之英武唐太宗之亞也

宋藝祖不能望其下風矣

### 五涼

晉時張軌據河西

今甘肅州

為前凉呂光繼之為後凉李暠

遷酒泉

今之肅州

又遷沙州

去肅州八百里于今沒於狄

號西凉沮渠蒙

遜據張掖今鎮番衛號北凉秃髮烏孤據姑臧

今之西寧

號南

凉唐呂溫詩樓高望五凉

壻務

栢人城東北有一孤山閼駟十三州志以為舜納于大  
麓即此山栢人城西有碑漢桓帝時徐整所立銘曰上  
有壻務山王僑所僊壻音權務即旄丘之旄也魏收為  
趙州莊嚴寺碑壻務之精即用此事

鴻溝

鴻溝今之滎陽符離今之靈壁問其縣人亦或不知

醋溝



唐岑參詩鴈塞通鹽澤龍堆接醋溝方回云鹽澤人皆知之醋溝人所未知也非惟人未知方回蓋亦不知為此言以掩後人耳考關駟十三州志山氏城北為高踰淵又東北醋溝水出焉水在中牟鹽澤見漢書郭緣生述征記醬魁城至醋溝凡十里

### 梅社

宋國有梅社

此名甚新

太社惟松東社惟桐南社惟梓西社

惟槐則梅社蓋北社也

雲根

古詩黝黝布雲根  
森森散雨足雲生於石故名石曰雲根  
沈約賦戶接雲根庭流松響杜詩井邑住雲根  
賈島詩移石動雲根元魏裴粲傳栖素雲根餌芝清壑

夜郎

漢夜郎縣屬牂牁郡唐書玆州牂牁郡本且蘭國在今  
播州界玆州在今施州歌羅寨夜郎在桐梓驛西二十  
里有夜郎城碑尚在字已漫滅

紫濛

宋人送中國使臣使契丹詩以青瑣對紫濛人多不知其出處按晉書慕容氏自云有熊氏之裔邑於紫濛之野蓋以慕容比遼是詩宋遼方結好故雖送別紀行之詩畧不涉譏刺之言此用紫濛字亦隱而妙矣方虛谷注云紫濛夷中館名蓋隔壁妄猜之言爾

秦得百二齊得十二

漢書田肯曰秦形勝之國也帶河阻山縣隔千里持戟

百萬秦得百二焉夫齊東有瑯琊即墨之饒南有泰山之固西有濁河之限北有勃海之利地方二千里持戟百萬縣隔千里之外齊得十二焉此東西秦也應劭曰言河山之險與諸侯相縣隔絕千里也所以能禽諸侯者得天下之利百二也蘇林曰百二得百中之二二萬人也秦地險固二萬人足當諸侯百萬人也顏師古曰縣隔千里應說得之秦得百二蘇說是也又曰秦得百二二萬人當諸侯百萬人也齊得十二二十萬人當諸

侯十萬人也所以言懸隔千里之外者除去秦地而齊乃與諸侯計利便也右舊說如此近日程秦之云田肯之語簡隱故諸家之說紛然肯謂百二也者言地據險而人力倍苟得百矣則其力可二是得百人則其力倍之如二百人也齊得十二理亦猶是也若定其讀當以得百為一句而二焉自為一句也十二亦然皆言人力半而必可倍正一理矣而必更易其語如此詰屈者別有理也秦險之出國境遠矣自函谷以及潼關近八百

里其右阻河其左傍山兩面河山夾險敵來犯關也常在千里之外故能得百而二之以為二百其力可常也若夫齊亦有險矣然而地遠力分若未能踰其所恃之險則十萬人之力亦可倍之以為二十萬矣若敵人來犯已在千里之內則險阻已自不全故雖得十亦不能遽為二十之用也故秦中得百而二常在定險之內齊之得十而二則在敵未犯險之前此其分別險要而剖白言之不一律也此正古文之出奇者不可以易言也

慎按百二十二之語後世亦多此例如云軍士奮勇無  
不一當百如云一夫當闔萬夫莫開又當百錢亦曰百  
一錢言一可當百也當十錢曰百十錢言十可當百也  
程語自明不必破前說耳

問諸水濱

左傳屈完對管仲云君其問諸水濱杜預曰當時漢水  
未屬楚李善夷曰杜之注其為謬哉且楚實殷之始封  
楚苦縣瀨鄉在漢水東北則漢水於西周之際豈未屬

楚乎又詩云奮伐荆楚深入其阻鄭注云深入方城之阻也方城在今漢水北豈昭王時未屬楚乎屈完以齊桓所問之大不敢他對但請自問於水濱而人莫之知也漢水實屬楚也久矣

蘇堤始末

東坡先生在杭州潁州許州皆開西湖而杭湖之功尤偉其詩云我在錢唐拓湖渌大堤士女爭昌丰六橋橫絕天漢上北山始與南屏通忽驚二十五萬丈老葑席



卷蒼雲空此詩史也而注殊畧今按宋長編云杭本江海之地水泉鹹苦唐刺史李泌始引西湖水作六井故井邑日富及白居易復浚西湖所溉千餘頃然湖水多葑近歲廢而不理湖中葑田積二十五萬餘丈而水無幾矣運河失湖水之利則取給於江潮潮渾濁多淤河行闌閼中三年一淘為市井大患而六井亦幾廢公始至浚茅山鹽橋二河以茅山一河專受江潮以鹽橋一河專受湖水復造堰閘以為湖水蓄泄之限然後潮不

入市間至湖上周視良久曰今願去葑田葑田如雲將  
安所置之湖南北三十里環湖往來終日不達若取葑  
田積之湖中為長堤以通南北則葑田去而行者便矣  
堤成杭人名之曰蘇公堤云合是觀之則公之有功杭  
人大矣予昔在京問之杭之士夫亦不知今閱公詩注  
亦畧故詳注之嗚呼治水之難久矣宋之世修六塔河  
二股河安石以范子淵李仲昌專其事聽小人李公義  
宦官黃懷忠之言用鐵龍爪濬川杷天下皆笑其兒戲

積以數年糜費百十萬之錢穀漂沒數十萬之丁夫迄無成功而猶不肯止至其績敗功圯而姦臣李清臣為考官猶以修河問策欲掩護之甚矣宋之君臣愚且戇也視東坡杭湖潁湖之役不數月之間無糜百金而成百世之功其政事之才豈止十倍時流乎公又欲鑿石門山運河以避浮山之險當時妬者盡力排之又欲於蘇州以東鑿挽路為千橋以迅江勢亦不果用人皆恨之噫難平者事古今同一慨矣

# 四道三谷

何仲默三秦志曰自秦入蜀有三谷四道三谷者其西南曰褒谷南曰駱谷從洋入東南曰斜谷從郿入其所從皆殊舊志謂首尾一谷非是其棧道有四出從成和階文出者為沓中陰平道鄧艾伐蜀由之從兩當出者為故道漢高帝攻陳倉由之從褒鳳出者為今連雲棧道漢王之南鄭由之從城固洋縣出者為斜駱道武侯屯渭上由之此四道三谷者關南之險阨攻取所從來

固矣

舊志云駱谷儻谷同  
谷褒谷斜谷同一谷

趙州石橋

趙州石橋望之如初月出雲長虹飲澗

妬女廟妬婦津

妬女者介之推妹也廟在并州壽陽縣妬婦津在洛水  
劉伯玉妻死投此水為神

玉峰秘受圖

星之形我之氣應我心為我衛作我吉因我勢作我凶

因我弊

玉門夕陽亭

玉門地在成臯戰國策武王有玉門之難比文王有羨  
里之厄其後漢高帝滎陽之敗亦獨與滕公逃出成臯  
玉門此一玉門也聖賢之君兩危矣董卓舉兵犯關脅  
詔使种邵之於夕陽亭而晉之亂亦由荀勗教賈充夕  
陽亭餞席之一言此一夕陽亭也而漢晉兩凶渠相踵  
惡地固應爾耶

山谷詩紀地震

邇來后土中夜震有似巨鰲復戴三山遊傾墻摧棟厭  
老弱冤聲未定隨洪流地文劃剝水坼沸十戶八九生  
魚頭稍聞澶淵渡河日數萬河北不知虛幾州山谷此  
詩作於紹聖之年地震之異如此而史不書

子昂太白詩語及峨眉

陳子昂詩飛飛騎羊子胡乃在峨眉又云眇然坐何慕  
吾蜀有峨眉又曰峨眉杳如夢仙子曷由尋李太白蜀

道難云西當太白有鳥道可以橫絕峨眉顛贈僧行融  
云梁日湯惠休常從鮑照遊峨眉史懷一獨映陳公出  
卓絕二道人結交鳳與麟送友人之羅浮云爾去之羅  
浮我還憩峨眉中道濶萬里霞月遥相思登峨眉山云  
蜀山多仙山峨眉邈難匹青冥倚天開彩錯疑畫出冷  
然紫霞賞果得錦囊術雲間吟瓊簫石上弄寶瑟平生  
有微尚歡笑自此畢烟雲如在眼塵累忽相失儻逢騎  
羊子携手凌白日峨眉山月歌云月出峨眉照滄海與



人萬里長相隨黃鶴樓前月華白此中忽見峨眉客峨眉  
山月還送君風吹西到長安陌粉圖山水歌云峨眉  
高出西極天絕句云峨眉山月半輪秋二公皆吾蜀人  
而注想留詠於峨眉中丞明崖張公曾有遊峨之約疾  
阻未果書此以寄以示終成寄遊之意云

升菴集卷七十八